

Model

# Cartas da rollas

## Simon Spiller, trenader da ballapei per la selecziun U14

Ti eis trenader da ballapei d'ina squadra U14. Roman Müller ei in fetg bien giugadur da ballapei en sia uniun e siu trenader ha proponiu el per la selecziun. Ti has gia viu el sil plaz da ballapei, nua ch'el ha fatg ina fetg buna impressiun. Avon che ti sedecidies denton definitivamein per el, vul ti mirar tgei informaziuns supplementaras che ti anflas davart el. Cun agid d'ina maschina da tschercar anflas ti il protocol da WhatsApp e legias el. Tgei raquentas ti a tiu trenader assistent Oli Zuber davart Roman? Eis ti aunc adina dil meini ch'el seigi adattaus? Ha el la disciplina necessaria? Eis el sauns?

Entscheiva aschia: «Jeu hai tschercau informaziuns davart Roman Müller ...»

## Heinrich Unterseer, specialist da reclama

Ti eis specialist da reclama e vul vender differents products a Roman. Tgei offeresses ti tut ad el?

Entscheiva aschia: «Jeu vendess ils suandonts products a Roman ...»

## Rahel Indergut va ella classa parallela dad Olaf e Roman ed ei inamurada da Roman

Ti eis inamurada da Roman ed has perquei googlau el. Ti anflas il protocol da WhatsApp e legias el. Ti sas buca che Sandy ei sia cusrina. Tgei tratgas ti da Roman? Vul ti aunc adina el sco amitg? Ti telefoneschas immediat a tia megliera amitga e raquentas tgei che ti has legiu.

Entscheiva aschia: «Ti creis buca tgei che jeu hai anflau ora da Roman ...»

## Maria Müller, mumma da Roman

Il trenader da ballapei da Roman raquenta a ti ch'entgins protocols da WhatsApp da Roman seigien vegni publicai egl internet. Ti has tema che la publicitad savessi haver access a datas privatas. Perquei tschercas ti tezza ils protocols egl internet e legias els.

Ti vegns sissu che Roman ha detg manzegnias a ti e ch'el ei ius cun skateboard mesjamna enstagl da frequentar las lecziuns supplementaras.

Tgei tratgas ti ussa da Roman? Tgei schesses ti ad el?

Entscheiva aschia: «Jeu havess buca tertgau che ...»

## Ti

Tgei tratgas ti da Roman? Co giudicasses ti el? Tgei para bien a ti e tgei buc?

Entscheiva aschia: «Jeu tratgel che Roman ...»

## Dino Müller, bab da Roman

Il trenader da ballapei da Roman rauenta a ti ch'entgins protocols da WhatsApp da Roman seigien vegni publicai egl internet. Ti has tema che la publicitad savessi haver access a datas privatas. Perquei tschercas ti tez ils protocols egl internet e legias els.

Ti vegns sissu che Roman ha detg manzognas a ti e ch'el ei ius cun skateboard mesjamna enstagl da frequentar las lecziuns supplementaras.

Tgei tratgas ti ussa da Roman? Tgei schesses ti ad el?

Entscheiva aschia: «Jeu havess buca tertgau che ...»

## Roman Müller, scolar, ses protocols ein vegni publicai

Ponderescha tgei che las suandontas personas savessen tertgar da tei, cura ch'ellas legian ils protocols da chat:

- Simon Spiller, il trenader da ballapei d'ina squadra U14. El vul s'informar, sche ti eis disciplinaus e sauns avunda per dar culla selecziun.
- Heinrich Unterseer, specialist da reclama. El vul vender a ti products che ti savesses duvrar tenor el.
- Rahel Indergut, ina scolara da tia classa parallela. Ella ei inamurada da tei e googlescha tei per survegnir dapli informaziuns sur da tei.
- Tes geniturs Maria e Dino Müller. Il trenader da ballapei raqueta ad els ch'ils protocols da chat seigien online. Perquei ch'els fan quitaus, vulan els era leger quels.

Ulteriuras informaziuns sur da tei:

- Sandy ei tia cusrina e vus secapis fetg bein. Tschei di haveis vus discurreu da differentas jeans. Sinquei has ti tarmess ad ella il maletg cul rotoer travestgiu.
- Olaf ei tiu meglier amitg, cun el vas ti savens cun skateboard.
- Mesjamna vargada havesses ti atgnamein giu lecziuns supplementaras. Cunquei che tiu scolast ei staus malsauns, eis ti ius cun skateboard cun Olaf senza informar tes geniturs.
- Tschei di ha enzatgi engulau tiu velo, schegie che ti havevas serrau giu el. Ti has stuiu ir tier la polizia e pagar in castitg da curonta francs, perquei che ti havevas mess il velo en in liug buca lubiu.
- Tiu giavisch ei da far part dalla selecziun da ballapei U14. Ti duesses gleiti survegnir in invit ad in trenament d'emprova.
- Dad ir cun skateboard has ti sturschiu duas gadas in det, ti has denton adina saviu dar ballapei.
- Duront il davos trenament has ti rut ora in dent en in duel ed has stuiu ir tiel dentist.
- Cun Olaf e Sandy has ti fatg inaga aschi tuppas sgnoccas sur dil lavar dents ch'igl ei dapi lu in running gag da scriver a ti da lavar ils dents.
- Perquei che ti has problems da sedurmentar, eis ti savens allerts tochen mesanotg e legias enta letg ni das giugs cul telefonin.
- Ils raps per las rollas dil skateboard has ti survegniu da tia tatta. Ti has persunter stuiu gidar ella da zerclar igl iert.